

خَطِ سِوَمِ يُوَحَنَّا

پیشگفتار

نوشته کُننده امزی خط ام یوَحَنَّا باچه زیدی آسته و ای خط ره بلده غایوس رهبرِ جماعتِ ایماندارا نوشته کده. دَ امزی خطِ یوَحَنَّا از غایوس تعریف-و-توصیف مونه و بخاطرِ کومک و تشویق شی تَشْکُری مونه. مگم یگ نفرِ دیگه ره که نام شی دیوترفیس آسته سرزیش مونه و غایوس ره دَ باره ازو خبردار مونه.

فهرستِ عنوانها

- دُعا و سلام (آیه ۱-۴)
- قدردانی از غایوس (۵-۸)
- شکایت از دیوترفیس (۹-۱۰)
- نصیحتِ یوَحَنَّا (۱۱-۱۲)
- سلامِ آخِری (۱۳-۱۵)

دُعا و سلام

^۱ از طرفِ بزرگِ جماعت، بلدهِ غایوسِ عزیز که او ره دَ راستی دوست دَرُم.

^۲ دوستِ عزیز، ما دُعا مُونُم که از هر نگاه کامیاب و تندرست بشی امو رقم که روح-و-روان تُو سالم آسته. ^۳ ما غدر خوشحال شُدُم و ختیکه بعضی برارو آمده دَ باره تُو شاهدهی دَد که تُو دَ حقیقت وفادار آستی و مُطابقِ راستی-و-حقیقت رفتار مُوکُنی. ^۴ ازی کده هیچ خوشی بلده مه بزرگتر نیسته که بشنوم که بچکیچای مه دَ مُطابقِ حقیقت رفتار مونه.

قدردانی از غایوس

^۵ دوستِ عزیز، دَ هر چیزی که بلده برارون ایماندار انجام میدی، وفاداری خُو ره ثابت مُوکُنی، حتی اگه اونا قد از تُو ناشنخته ام بشه. ^۶ اونا دَ باره مُحَبَّت تُو دَ حُصُورِ جماعتِ ایماندارا شاهدهی دَد. اگه اونا ره بطورِ خُدا پسندانه دَ سفرِ ریی کنی، کارِ نیک مونی، ^۷ چون اونا بخاطرِ نامِ مسیحِ بلده خدمت کدو بر شده و هیچ رقم کومک ره از مردمایِ غیرِ ایماندار قبول نکده. ^۸ پس بلده ازمو فرض آسته که از ای رقم آدما پذیرایی کنی تا قد ازوا دَ اعلان کدون حقیقت شریک شنی.

شکایت از دیوترفیس

^۹ ما یگ خط بلده جماعتِ ایماندارا نوشته کدیم، مگم دیوترفیس که خوش دَره نفرِ اولِ بشه توره ازمو ره قبول نمُوکُنه. ^{۱۰} پس اگه بییم، از کارای که او انجام میدیه یاد آوری مُونُم، چون او دَ باره ازمو از روی کینه تورای پوچ-و-ناسزا مُوکِه و دَ امزی کارا ام قناعت نکده، بلکه از برارون ناشنخته ام پذیرایی نمُوکُنه و کسای ام که میخایه پذیرایی کنه، اونا ره منع مُوکُنه. اگه از آید شی نَشُد، اونا ره از جماعتِ ایماندارا بر مونه.

نصیحتِ یوحنا

^{۱۱} دوستِ عزیز، از چیزای بد سرمشق نگیر، بلکه از چیزای خُوب. هر کسی که کار خُوب مونه، از خُدا آسته، و له هر کسی که کار بد مونه او خُدا ره ندیده. ^{۱۲} پگ مردم دَ باره خُوبی دیمیتریوس شاهدهی میدیه، حتی خودِ حقیقت

ام. مو ام دَ باره ازو شاهدي ميدي و شمو ميدينيد که شاهدي ازمو راست آسته.

سلام آخري

^{۱۳} ما غدر چيزا درم که بلده تو نوشته کئم، مگم نميخاييم که قد قلم و سياهي د روي قاغذ نوشته کئم، ^{۱۴} مگم اميد درم که تو ره د زودي بنگرم و مو روي د روي توره بگي.

^{۱۵} آسايش-و-آرامش نصيب تو شنه. دوستا سلام هاي خو ره بلده تو ربي مونه. دوستا ره د اونجی ام نام گرفته سلام بگي.